

MEDITATIONS

DE L'HERMITE

VALERIAN.

TRADVITES DE BON

Normand en vieux Gaulois , par

vn Pelerin du Mont S. Michel

en faueur de tous bons

François.

M. DC. XXI.

Case

F

39

1326

1621 for 2



MEDITATIONS DE L'HERMITE VALERIAN.

TRADVITES DE BON NORMAND
en vieux Gaulois, par vn Pelerin du Mont S.
Michel en faveur de tous bons François.

PViſe- ie, ò Tout-puiſſant, inconnu des grands Roys,
Mes ſolitaires ans, acheuer par les bois.

Diſoit vn des grands Poëtes de noſtre ſiecle,
d'autant que les eſprits recueillis dans la ſolitu-
de des deſerts ſont plus propres à la Meditation
que ceux qui ſont iournellement occupez dans
le continuel triſtrac du monde : Ainſi pouſ-
ſé d'un meſme reſſentiment, & apres auoir
reconnu les vanitez de la Cour, où i'ay eſté eſ-
ſeué des ma ieuneſſe, & paſſé la plus part de
mes ans, i'ay choiſi ce petit Hermitage au ſom-
met de cette montagne, pour y contempler
avec plus de repos la grandeur des merueilles
de Dieu, & l'inconſtance des affaires mondai-
nes. Que ſi quelqu'un neantmoins trouue en
ce diſcours beaucoup de choſes des occuren-
ces du temps, & que là-deſſus il vienne à blaſ-
mer mon genre de viure, en taxant l'exercice
de ma vie, comme contraire à la profeſſion d'un
ſimple Hermite, ſouſtenant eſtre impoſſible
de bien vacquer aux contemplations ſpirituel-
les parmy le meſlange des temporelles, ie le
ſupplie auant me condamner de ruminer pieu-
ſement, que l'on ne peut mieux remarquer la
bonté de Dieu, ſa Juſtice, & ſa miſericorde

qu'en jettant les yeux sur les desseins des extravagances humaines; Quiconque medite autrement ressemble au Juge qui condamne sur le moindre recit de l'une des parties, au lieu de les escouter toutes deux, avant que donner sa Sentence : Car on ne peut bien mediter en la Justice de Dieu, que l'on ne tombe aussi tost sur l'enormité des pechez des hommes, ny admirer sa bonté, que par la cognoissance de l'énorme malice des mortels, partant il n'est incompatible ny mal-seant à vn pauvre Hermite seullet d'esleuer ses Meditations spirituelles sur les insolences des temporelles : Non plus qu'au Pere Arnoux, de dire tous les iours son Chapelet au milieu des cabales de la Cour : Car comme le Soleil jette ses rayons generalement sur toutes les choses d'icy-bas, tant bonnes que mauuaises, sans pour cela en souiller sa lumiere; De mesme l'homme de bien peut entretenir son esprit de toutes les actions humaines, sans que son ame en soit entachée, ny empêchée de s'acquiter de ce qu'il doit à sa profession : Au contraire, cette occupation le porte à implorer iour & nuict la Diuine Majesté, tant pour ses pechez que pour ceux du peuple, & particulierement pour la protection de nostre bon Roy, & de la pauvre France, qui s'en va de toutes parts ruinée, si bien tost le Ciel ne met la main à sa conseruation, en preuenant les effets de sa desolation.

Les Meditations faictes de cette sorte par l'examen des particularitez sont bien plus édifiantes, & nous retirent bien autrement du mal que celles qui se font confusément sur le gene-

ral des choses d'icy bas par vne auengle croiance que l'on se forme que tout y est meschant, laquelle en cette maniere condamne quelquefois ce qui est bon, & embrasse ce qui est feint comme chose sainte : Ainsi font ordinairement la plus part des bons Chartreux, & les simples Religieux des autres Ordres, qui n'ont veu le monde que dans vn liure, & qui ne sçauent ce qui s'y passe, que par le desguisement d'un recit affecté, exagerant par fois vne chose plus grande qu'elle n'est, & puis passans legerement par-dessus vne autre de tres-grande consequence : Là ou celuy qui clair-voyant penetre dans l'origine du bien & du mal, s'aprophe puis apres de Dieu avec vne route autre lumiere que ceux qui vont ainsi à tastons dans les tenebres des ignorances de leurs conceptions : De là viennent les risées que l'on faict des Meditations grotesques que font ces idiots Religieux, peu versez aux matoiseries du temps, qui est cause que les sages mondains s'en gaussent, les nommans r'esueries de Cloistre, ce qui les endurecit, au lieu de leur attendrir le cœur, avec les atteintes d'une nuë verité : Partant il faut icy anoiier, que tant s'en faut que la cognoissance du Galimatia du monde nous empesche d'aproucher de celle de Dieu, qu'au rebours, elle nous dispose à nous d'estacher plus gayement des vanitez qui nous enueloppēt en les mesprisant comme grosses estoupes, qu'une simple estincelle reduict en vn moment en cendre.

La nourriture que j'ay pris dès ma ieunesse dans vn Palais Royal, m'a donné quelque adresse des meslanges du monde, dont ie me

fers encore aujourd'huy, pour demesler en beaucoup de choses le vray d'avec le faux: C'est le seul fruit que j'ay rapporté de la Cour, où ie confesse que j'ay veu faire beaucoup de mal, & peu de bien, ce qui a esté cause de me la faire mespriser, & de luy dire Adieu, pour me retirer avec Dieu en cet Hermitage escarté, où ie n'ay eu autre dessein en y entrant que d'y rouler le reste de mes iours en prieres, me distayant tant qu'il me seroit possible de la visite des Courtisans, & importunité des ames bigottes, qui ne peuvent vivre, ny laisser autrui en repos, mais tant s'en faut que j'y aye rencontré ce que ie m'estois promis pour ce regard, qu'au contraire ie ny ay pas si tost esté que j'ay eu sur les bras certains esprits malades par l'inquietude de leurs fantasies, qui se rendoient iournellement vers moy, pour chercher consolation: Ce chemin, estant tracé par la sainte renommée d'un vieux bon Hermite, qui estoit auparauant moy en celieu, à la place duquel j'ay succédé, & non à la capacité qu'il s'estoit acquise durant 48. années de vie solitaire, pendant lesquelles il auoit faict des rares recueils, tant des choses passées de son temps, que par luy predites: Ce qui l'auoit rendu si celebre, que ce n'estoit qu'un concours de peuple qui venoient de toutes parts pour auoir ses aduis.

Cette grande renommée m'esguillonna à deux choses. La premiere à l'imiter, puis que j'estois son successeur, & la seconde à recueillir les rares preceptes que les vilageois d'icy à l'entour racontotent auoir appris de luy.

Comme j'estois en cette peine, me pourme-

nant en mon iardinet, il me prit enuie d'arracher vn vieux laurier sec, qui estoit dans l'vn des coings d'iceluy, m'estant estonné plusieurs fois de ce que la curiosité de mon predecesseur ne l'auoit porté à l'oster pour y en planter vn autre. Or fouissant à l'entour pour le desraciner, ie rencontre vn gros caillou noir, fendu en deux pierres rassemblez, lesquels ayant des jointes, ie trouue escrit dedans vn quatrain qui contenoit ces mots,

*Ce laurier sec autresfois verdoyant
Est vn augure à l'Estat de la France,
Victorieux on l'a veu foudroyant
Et auourd'huy il tombe en decadence.*

Cette lecture me tint vn long temps l'esprit en suspens, pour auoir en soy quelque chose de sinistre, toutesfois apres auoir esleué les yeux au Ciel, à ce qu'il luy pleut garantir cette Couronne de tout mauuais presage, ie continuay mon petit traual, & ayant tiré encore quelque pellee de terre i'apperçois vn autre caillou comme le premier, dans lequel estoient ces vers,

*Paures Bourbons ne cherchez plus
Des Couronnes pour vos victoires
Ce laurier mort icy reclus,
Vous presage des couleurs noires.*

Alors ie m'arrestay tout court, touché de ie ne sçay quel estonnement, qui neantmoins m'eschaufa le courage d'acheuer mon entreprise. Ce que ie fis, tantost avec des tremblemens du corps tantost des mouuemens extraordinaires de l'esprit: en fin apres auoir assez approfondy la fosse le laurier cheut par terre, & tombant, ie descouure vne petite caisse de pierre qui me

mit en soupçon que quelque nouveau mystere y pourroit estre caché : aussi tost meü d'une nouvelle curiosité, i'oste le couvercle, & apperçois dedans deux instrumens, l'un faict comme les lunettes de Holande, dont vse le Duc de Bouillon pour prendre de loing les visees, desquelles Monsieur le Prince auroit grand besoin de s'ayder, encore plus le Comte de Soissons, & l'autre en forme d'entonnoir, à la façon de celuy dont se sert le Mareschal Desdiguieres, pour oüyr plus facilement les persuasions de Bulion & d'Eagent. Apres ie trouue vn memorial escrit de la main du bon homme enueloppé d'une grande Carte, representant le Royaume de France, avec toutes les Prouinces qui estoit fort vieille, toute deschiree par lambeaux & au milieu estoit escrit en lettre rouge, *Passai en po de Castilla* : Outre ce deslabrement elle estoit rongee en tous endroits, & aux bordures estoit escrit en lettres noires, *Mesnage de fauoris* : Sur le dos y auoit en gros caracteres, *Deuine & qui a faict le pis*, la dicte Carte & liure rempaquetez d'un eschantillon de l'estendart benit que le Pape Gregoire XIII. donna à *Sfondrat son nepueu*, lors qu'il conduisit en ce Royaume les troupes enuoyees du Vatican au secours de la sainte vnion Catholique, l'an 1591.

Toutes ces choses mytologiques, pleines de veritables mysteres me firent ressouuenir des tapisseries mystiques du Catholicon. Apres
Trouuier
au 9^e Jour
au 24
 i'ouure le liure, dans lequel le bon Hermite auoit escrit en formes de iournalier les occurrences plus memorables aduenües de son temps avec quelques sages aduis, tant sur les affaires passees

veillance publique, à fin de s'en garantir au pre-
 judice de son Maistre : Qu'ainsi ne soit, toutes
 les actions que Luyne a iugé estre agreables aux
 François (qui sont rares) il se les a voulu attri-
 buer seul, & là où il a preueu de la haine, il en a
 chargée les autres : A il fallu verifier quelque per-
 nicieux Edicts aux Parlemens : Il s'est seruy de
 la presence du Roy, & de celle des Princes, met-
 tant à couuert sa tyrannie aux despens de la re-
 putation d'autrui ; A il fallu retrancher les pen-
 sions ? Il a faict porter le roolle d'icelles par sa
 Majesté au logis du Comte de Chomberg, & luy
 s'en est allé à Lesigny, à fin que le mesconten-
 tement de la Noblesse tombast sur le Roy, laquel-
 le Luyne attire à luy par ce moyen, en leur pro-
 mettant en particulier de les faire restablir par
 son credit, se faisant ainsi des creatures aux des-
 pens du Roy : Que cecy ne soit tres veritable,
 il est bon de remarquer à ce propos vne gentille
 souplesse qu'il fit au camp d'Angers ; c'est qu'a-
 pres la drollerie du Pont de Sé, on mist quelques
 soldats blessés dans l'Hospital pour les faire
 penser. Le Roy leur enuoya a chacun vn escu
 cars, & par apres Luyne leur fit donner par vn
 des siens à chacun vne pistole, pour monstrier sa
 liberalité, en brauade de son Maistre. N'est-ce pas
 la vn bon valet qui se iouë de la reputation de
 son Prince ? Quand il a voulu restablir la Polet-
 te, & scachant que l'Edict agreoit aux Officiers
 du Parlement, Luyne y avouu aller seul, pour
 monstrier qu'il en estoit l'auteur, Mais quand
 il a fallu verifier l'alienation des quatre cens mil
 liures de rente sur le sel, il y a enuoyé Monsieur
 frere du Roy, employant vn innocent au mini-

stere de ses voleries. Voila la routine qu'il pratique en ses pernicious dessein : Qui ne voit pareillement que pour dominer tousiours, il tient Monsieur frere du Roy ciuilement prisonnier ? Quand il vint à Paris pour y faire verifier les derniers Edicts, les Bourgeois croyoiēt qu'on l'alloit conduire dans la Bastille : Il estoit dans vn carrosse avec le sieur d'Ornano son Gouverneur, nulle Noblesse à l'entour de luy, sinon vne compagnie de carabins conduits par d'Esplan, ayans tous le corcelet & l'armet en teste : N'est-ce pas de bonne-heure accoustumer ce ieune Prince à la seruitude d'un Fauory qui veut regner ? La Royne mere n'est-elle pas sous sa captivité ? Ne la fait-il pas suivre les armées : sans auoir respect à sa qualité, & à son sexe, ny aux incommodités de la longueur du voyage ? Qui a iamais veu mener à la guerre des femmes & des enfans ? Il traîne apres luy le Marechal Desdiguieres, qui sur les vieux iours sacrifie laschement, l'honneur de sa fortune aux pieds insolens de celle de Luynes. Le Pleffis-Mornay suit honteusement son chariot triomphal, apres auoir faict vn second volume du Mistere d'iniquité, pour dedier à Parabelle & Brassac : Ce n'est pas iusques à la personne du Roy qu'il n'apende à ses trophées, & à laquelle il ne donne des attaintes furieuses de son ambition. Vne des marques de la dignité Royale gist en la splendeur du respect que l'on luy rend, en quoy Luynes s'aquitte si mal, que par cette seule action il tesmoigne assez son peu d'affection, estant si irreuerend, qu'il traite de toutes affaires, sans le communiquer que lors qu'il luy plaist à sa Majesté, il parle à elle publi-

quemēt le bōnet sur l'aureille, il se fait mieux suivre qu'elle, & ce qui est à remarquer, il la meine à trouffe bagage çà & là, où les interests particuliers l'appellēt, sans en prendre auid du Conseil ny mēme en parler à la Royne regnante, n'y à la Royne mere sinon lors qu'on les faiēt partir.

Tous les voyages precipités qu'il faiēt faire au Roy, n'ont esté que pour aller débüquer quelque Gouverneur pour s'accommoder de leurs forteresses. Il en fera de mēme de la Couronne, si on le laisse suivre sa piste. Pourquoi non? Si en trois ans & demy de faueur, de simple Gentilhommeau il a bien osé effrontément se reuestir de la charge de Connestable, au preiudice de ceux, qui de rang & de capacité le meritoient cent fois mieux que luy, ne pourra-il pas avec le temps s'approprier des fleurs de lys au preiudice des Princes du sang aussi? Et comme il a frustré les Ducs du Maine, de Guise, & le Mareschal Desdiguieres de la Connestablie, il pourra bien exclurre les Bourbons de la Royauté. La centurie que j'ay trouué dans le memorial de mon predecesseur doit faire resner ceux qui y ont interest, voicy cē quelle contient.

*Les lys mourront en leur racine,
Dessous vn siecle mal-heureux,
Lors que les François mal gré eux
Boiront du ius de l'Aluine.*

Cette Prophetie Marque grandement le temps present, où l'on voit toutes choses sous le pouvoir absolu de Luyne, qui en quatre ans a espuisé le Royaume de Finance, & reduit son Maistre à l'emprunt. J'ay ouy vn des siens qui se vantoit auoir conduit grand nombre d'argent dans la

Citadelle d'Amiens, & asseuroit qu'il y auoit plus de trente millions de liures, c'est pourquoy lors que le Roy alla en Picardie, il n'entra dans ladite place que luy huietiesme, Luyne ayant commandé qu'on refusast la porte aux Gardes mesmes de sa Majesté, & à toute la Cour: Adjoutés à cette immense richesse, & à ce grand nombre de villes qu'il tient, vn desir ambitieux de regner, l'infidelité des François qui sont aujourd huy à qui plus leur donne, la charge de Connestable qui luy attribué l'autorité des armes, tout cela ensemble ne luy fraye-il pas le chemin à l'vsurpation? Qui l'empeschera d'y paruenir? Le Roy qui est tout bon, Monsieur son frere, qui est comme en prison? Les Princes, qui sont en diuision, ou la Noblesse, qui est adonnée à la corruption? Non, non, disent les Diaphoristes, le moindre mal qui peut arriuer à l'Estat, c'est la dissipation.

L'ambition d'honneur est tolerable aux hommes, d'autant qu'elle nous porte aux actions genereuses: Mais l'ambition de regner est redoutable, en ce que pour y paruenir elle pousse l'esprit aux actions tyranniques: Luyne tient tout a faict du dernier, il entreprend tout audacieusement, il ne paroist doux que pour tromper, & promet largement pour abuser ceux desquels il a besoin. Je m'en raporte à Monsieur nostre premier President de Roüen, & Dieu vueille qu'il ne iouë vn tour d'ingrat au Roy, aussi bien qu'il a faict aux enfans de deffunct la Varanne, qui a esté l'auteur de l'auancement de Luyne, ayant procuré pour luy & ses freres neuf cens liures de pension, puis il fit tant vers le feu Roy qu'il l'augmenta à douze cens liures, & les introduisit Gentils-

hommes seruans pres sa Majesté alors Dauphin, & en recompense commēt a il traicté les enfans du deffunct? Iusques à desuier à la Comtesse des Vertus vn des moindres benefices vacans par le deceds de l'Euesque d'Angers son frere, desquels Luyne a disposé à son plaisir: S'il a esté ingrat à cette maison, & enuers beaucoup d'autres de ses bien-faicteurs: La continuation de ses procedures ne promet pas qu'il face mieux enuers le Roy. Tant l'ingrat est vne beste abominable & mal-faisante!

Et d'autant qu'il ny a que les Princes qui le peuuent trauerser en son agrandissement, j'escoutois vn des sublimes speculateurs du temps qui racontoit que le premier conseil que D'Ea-gen & le Pere Arnoux donnerent à Luyne fut d'empescher le retour de la Roynie mere pres du Roy. C'est pourquoy ce Iesuite fut enuoyé à Blois visiter ladicte Dame, où estant il s'efforça pieusement de persuader, voire de faire iurer à cette Princesse sur les Sainctes Euangiles qu'elle ne reuiendrait en Cour, ny demandroit à voir ses enfans, que quand les affaires du Roy le permettroient, c'est à dire celles de Luyne: & le second conseil fut de trauailler au plustost à mettre la des-vnion entre les Princes, ce qu'il a si bié pratiqué, qu'il a eu cét astuce de faire croire à sa Majesté, que luy & ses freres estoient les seuls fidelles seruiteurs, sur lesquels elle se doit reposer, rebuttans generallement tous les autres, de quelque qualitez qu'ils fussent. Ce n'est pas iusques à la Roynie qu'ils esloignent tant qu'ils peuvent des embrassemens du Roy. Ils portent l'esprit de sa Majesté à viure en soupçon de Monsei-

gneur son frere, & sur tout de la Royne sa mere: En suite de cela pour ruiner les Princes plus facilement, Luyne a semé la diuision parmy eux: Premièrement il faict son possible, à ce que Monsieur frere du Roy, & Monsieur le Prince ne s'entre-aiment point, se seruant à cet effet de certains valets qui font tous les iours des petits rapports à l'un & à l'autre pour alterer leur affection. Pareil soin a-il qu'il ne se renouë aucune intelligence entre la Royne mere & ledict Seigneur Prince, à fin de subsister tousiours aux despens des deux: Le mesme fait-il entre ledict Prince & le Comte de Soissons; & sont tous si auenglez de ne preuoir que Luyne triomphe de leur simplicité: Que Madame la Comtesse se souuienne que lors qu'il resolut de continuer la detention du Prince au Bois de Vincennes, il luy protesta de la servir en tous les interets de Monsieur le Comte, & ne vouloir tenir sa fortune que de sa bien-veillance, employant au mesme instant (notez ceci) le verd & le sec pour alier l'ancienne amitié qui estoit entre ladiete Dame & ledict Seigneur Prince. Puis quand il a veu ne le pouuoir plus detenir prisonnier, il a quitté le Comte, & tasché de gagner le cœur du Prince, lui faisant entendre qu'il traualloit à disposer l'esprit du Roy à lui donner la liberté, afin de l'obliger par là à s'opposer aux efforts nouveaux d'un grand parti qui se formoit contre la tyrannie des trois freres. Non content de cela pour se descharger de la detention du Prince & des enfans qui luy estoient morts dans le Bois de Vincennes, Luyne lui faict entendre faussement que ladiete Dame auoit empesché sa liberté pour

le rendre par là irreconciliable. Voila comme il a abandonné le Comte, sans se souuenir de l'assistance qu'il en a receu, & s'est appuyé du Prince en ces derniers mouuemens qu'il a puis apres quitté, quand il à pensé n'en auoir plus affaire, & s'est remis avec le dit Comte duquel il se seruira & le trompera comme auparauant. Autant en a il fait de la maison de Lorraine, de laquelle il a tiré de grâds supports, & puis a fait des nazar-des à Monsieur de Guise, auquel il auoit promis la charge de Grâd Marechal de Camp & armée, pour lui faire quitter ses pretentions de Connestable: Monsieur du Mayne a esté traicté de mesme, auquel cette dignité appartenoit, & par merites, & par promesses du Roy: & le Marechal Desdiguieres (quoy que vieux Renard) s'y est laissé piper, & quasi tous les Grands de la Cour. C'est pourquoy vn bon compagnon disoit que Luyne faisoit des Princes comme des seaux d'un puis, l'un desquels on fait descendre en bas toutes-fois & quantes qu'on tire l'autre en haut pour auoir de l'eau. Vn autre rencontra aussi plaisamment, qui comparoit Luyne à vn danseur sur corde, lequel panche ou hausse son contre-pois pour l'accommoder aux mouuemens de son corps: Qu'ainsi faisoit-il des Grands les approchant ou reculant, selon qu'il recognoist en auoir affaire pour se maintenir au sommet de la rouë de fortune.

Sur cela i'entends la populace qui s'escrie contre tous les Seigneurs, les accusans de lascheté, & Messieurs du Conseil d'infidelité, de consentir à tant de calamitez causées par vn Fauory: Pour moy i'auouë que ie ne m'estonne pas si fort de

nos miseres, que de la continuation de nos desordres: Admirant en moy-mesme comme tant de confusions passées (qui toutes ont pris naissance de l'ambition des mignons) n'ont en fin rendu les François plus prudens. Et que tant de vieux Conteyllers d'Estat n'ayent trouvé moyen de remedier aux maux de l'Estat, ou que du moins pour leur honneur ils n'ayent publiquement donné leurs aduis pour les prevenir!

La durée des guerres fait les bons soldats, mais la longueur de nos desolations ne nous rend point plus sages au faict du gouvernement. Ou est seulement le premier qui aye encore adverty le Roy des bourasques qui menassent sa Couronne? Exempterai-je ceux qui ont vieilli dans les affaires, qui regorgent de biens, qui ont mesme le pied dans la fosse, & ausquels il ne reste rien à souhaitter, que de faire quelque genereuse action pour mourir glorieusement! Helas aucun d'eux n'a encore porté les ressorts de son courage iusques là. Ils sont Conseillers de complaisance, & non de conscience, r'affinez à la mode, & nourris de maximes accommodantes.

Cependant nous sentons les orages des vents-furieux du Midy, sortant des Pirenées & monts Apenins, & ceux qui sont commis aux eschauguettes pour desconurir l'ennemy n'en disent mot: Voila l'habileté des gens du siecle, & l'estat ou nous sommes reduits: Estat deplorable, & mal-heur irremediable tout ensemble! La dessus i'entens dire à Contrade qu'il ne se faut estonner de tout cela, que ce Royaume a tousiours subsisté dans les confusions, que Monsieur de Luyne ne fait rien que ses predecesseurs n'ayent fait deuant

passées, que celles d'aduenir: & d'autant que telles curieuses recherches requeroiēt du loisir pour les bien entendre, ie transportay le tout en ma Cellule, tant pour philosopher sur les circonstances d'icelles, que pour les conferer auec les belles leuees de bouclier du temps present.

Estant retiré en ma chambrette, la premiere chose que ie fis ce fut de manier les deux instrumens susdicts, pour descouvrir à quel vsage le bon homme s'en seruoit. En fin ne pouuant trouuer le secret d'iceux par science, ie l'apris par hazard, au rebours de Cadnet qui à apri l'art militaire sans hazard: Ainsi apres les auoir bien maniees sans y sçauoir rien cognoistre non plus que le Garde des Seaux aux chemins d'alentour d'Angers: Ie m'auisay de mettre le bout de l'entonnoir dans ma bouche, pour essayer s'il seroit propre pour vn Cor de chaste: mais n'ayant l'embouchure commode à tel vsage: il m'aduint par cas fortuit de le mettre en mon oreille, & soudain i'entendis vn bourdonnement de plusieurs endroits, ie iugeay que cet instrument seruoit pour l'oüye, & de fait l'ayant tenu dans l'oreille auec plus d'attention, i'oüys plusieurs propos qui se tenoient aux Parroisses circonuoisines de mon Hermitage, & entre autre i'entendis la seruante du Seigneur d'un village qui reprochoit au valet de chambre qu'il faisoit le Luyne, & qu'il entretenoit son Maistre en diuision avec sa mere, femme, frere & parens: afin de gouuerner tout seul son Maistre & sa maison. Vne autre bonne vieille racôtoit au Curé qu'elle auoit ouy dire au Marché que Monsieur le Connestable alloit canoniser la Rochelle avec cent canons, la

simplicité de cette femme me fit rire, voyant qu'au lieu de canoner elle disoit canoniser, comme si cette ville eust esté vne seconde Sœur Marie de l'Incarnation, appelee dans le monde Mademoiselle Acarie, deslors ie preueu que i'entendrois bien d'autre droleries.

Quand à l'autre instrument, ie ne scauois non plus penser à quoy il pouuoit estre vtile : Mais la croyance que i'auois qu'il n'estoit moins propre que l'autre, me fit aussi estre curieux d'apprendre ce à quoy il pouuoit seruir, en fin voyant qu'il ne differoient guere des lunettes de Holande, ie me tourne sur Paris, & le portât sur l'œil pour regarder la ville, ie remarque que ie voyois dās les maison aussi à clair que dans les champs, & d'autant que le Louure est en aspect droit au Mon-Valerien ; i'arrestay mes bezicles sur la grande Galerie, dans laquelle ie recogneu le Roy jouant avec quelque ieune Noblesse. A l'un des bouts d'icelle ie vis Monsieur de Luyne entourné de plusieurs Princes, au commencement ie doutois que ce fut luy, parce qu'il estoit couuert, & les autres auës testtes : mais apres auoir regardé de rechef ie trouuay qu'il y estoit en personne, & Messieurs nos Grands en valets. Ainsi par le moyen de ces deux instruments, ie m'imaginay aussi-tost que ie ne pouuois faillir que ie ne descouvrisse de grāds secrets en peu de temps, & qu'il falloit bien que mon predecesseur eust appris pendant le cours de sa vie.

Ruminant en moy-mesme sur toutes ces choses, ie me jette incontinent à genoux, priant Dieu de m'assister en tous mes mouuemēts : Et puis que ie m'estois retiré vers luy pour M'editer en

sa gloire, ie le suppliois destourner de mon esprit toutes les veines curiositez de la terre, à ce que les diuertissemens mōdains ne retardassent mon ame de s'esleuer au Ciel, où gist le souverain bien, & non en la recherche chagrine des malversations ordinaires de la Cour, où pour des heures de plaisirs, on rencontre des anneés entières de tristesse.

Discourant donc ainsi, vn doux assoupissement me print, tel qu'il suruient quelques-fois au Pere Berulle, lors qu'il se perd dans les extases de ses conceptions politiques : Or pendant cét endormissement, il me sembla que le Genie du feu Roy Henry le Grand me mit en main les deux instruments susdits, me disant : Ne crains d'vser de ces outils, voy tout, escoute tout, & note ce que tu remarqueras digne d'estre reuelé au public : car le salut d'un Estat gist à descouvrir ce qui s'y passe, à fin de preuenir le mal qui s'y brasse. Ne neglige donc de veiller au salut de la France que j'ay tant chérie, reuele librement ce que tu apprendras par tes secrets, si le Roy mon fils ne t'escoute à son dam, ses bons seruiteurs t'en sçauront tousiours gré, & travailleront à leur possible de repousser les ambitieux desseins de trois auortons, qui veulent tout dissiper, pour establir leur orgueilleuse fortune.

Ces propos prononcez par vn esprit attristé, ce me sembloit, m'esueillèrent aussi melancolique que Cadnet, lors qu'il employa la premiere nuit de ses nopces à foiter, au lieu de carasser sa chere espouse : Neantmoins reuenant à l'affaire, ie me resoudis de suivre le dessein, pour cognoistre celui de la France, qui par ses desordres pro-

nostique nos mal-heurs, & par nos mal-heurs la ruine infaillible de la Monarchie. De cela, chacun en remet la faute sur son compagnon, nul ne se diét autheur du mal, les Princes en accusent les Fauoris, les Fauoris le rejettent sur les Princes, chacun publie son innocence, les Conseillers d'État en lauent leurs mains, le Garde des Sceaux en est deuenu tout blanc de chagrin: Cependant le pauvre peuple languit, & puis que seul il en porte la peine, ie me resouds d'entendre attentiuement ses plaintes, sans m'arrester aux desguisements que les Grands mettent en auant, pour palier leur lascheté, desquels ie ne laisseray qu'à, qui là de recueillir les discours, pour paruenir à vn esclarcissement plus veritable de la source de nos miseres.

Sur ce sujet, il me souuient d'vne dispute suruenue depuis peu entre quelques Artisans du Faux-bourg de d'Arnetal, deuisans entre la poire & le fromage, sur la cause du mal-heur du temps, faschez de ce que l'on fortifie Quilebœuf, au preiudice de la promesse solemnelle que le Roy auoit donnée à ceux de Roüen, tant durant la tenuë de l'Assemblée des Notables, qu'encore depuis par ses lettres patentes, portans la desmolition de cette place, comme ruineuse à toute la Normandie. Et cependant sans nulle necessité, & nonobstant les deffences du Parlement, on ne laissoit d'y trauailler, pour y establir vn nid de tyrannie, au grand détrimet du pauvre peuple: Chacun disant là-dessus sa ratelée; l'vn soustenoit que Dieu le permettoit pour nos pechez, l'autre, que le Roy ne scauoit pas tout le mal qui se commettoit sous son autorité: vn autre prou-

uoit que les Parlemens ne valloient pas vn tur-
lupet d'endurer telles choses : vn autre disputoit
que c'estoit Monsieur de Luyne qui auoit enuie
d'y establir son frere Branche, & de debusquer le
Colonel d'Ornano de la Prouince : En fin vn
bon vieillard prenant la parole, leur vint à dire,
mes enfans ie vous veux apprendre deux choses
que i'ay remarquées durant le cours de ma vie.
C'est que ie n'ay point veu de repos dans les mai-
sons, n'y de bon-heur dans le Royaume, depuis
que les femmes sont deuenues Casuistes, & que
les fauoris ont gouuerné : Apprenez cela de
moy, comme d'un Prophete, tant plus les ma-
ris & les Bourgeois y penseront, & plus ils reco-
gnoistront que ie dis vray, ie m'en vay boire à
vous tous la dessus : Ce bon Manant ratiocinoit-
il mal, à vostre aduis? Voicy ce que mon prede-
cesseur en a laissé en ses memoires.

*Depuis que les femmes ont mis
Le nez au cas de conscience,
Depuis ce temps-là les maris
Ont appris l'art de Penitence.*

Et en vn autre endroict i'ay trouué cét autre
diston.

*Deslors qu'un Monsieur se remet
Au gouuernement d'un valet,
Tout desordre chez luy abonde,
Il se faict veoir foible d'esprit,
Son valet le pille & destruit,
Et ce rend ridicule au monde.*

Tous les particuliers qui sont tombez en ce def-
faut ont esté ruinez, & les siecles passez ont fait
voir à la France la verité de ceste obseruation.
Car toutes les fois qu'elle a esté reduitte sous ce

ioug, l'Estat en a grandement paty, tesmoing ce qui s'est passé durant le regne de Henry III. D'autant que tous les mignons sont Chancres malins, principalement ceux qui s'emparent du commandement souverain, lesquels terrassent tousiours leurs maistres, & rongent ses subiects iusques aux os.

Qu'ainsi ne soit, sans aller chercher les exemples del'antiquité, arrestons nous à ce que nous auons veu, & voyons deuant nos yeux: Considerons les troubles que la France a soufferts pour cela, & les volleries qui s'y sont commises. Conchine n'a-il point dissipé tous les thresors que le feu Roy auoit amassé, & pour son sujet n'auons nous pas veu tous les Princes se souleuer? Luyne ayant succédé à sa place, n'a-il pas encore faict pis, ayant rauy en vne heure toute la substance del'autre? Et non content, n'a-il pas espuisé toutes les Finances du Royaume, & surchargé le peuple d'vn nombre infiny d'Edicts tres pernicieux, entr'autres celuy des Procureurs, duquel i'ay trouué ce quatrain dans le manuscrit de mon predecesseur.

*Lors qu'on verra les Procureurs
Erigez en tilre d'Offices
Alors accroistront nos mal-heurs,
Et des autres les malefices.*

Cependant il gaigne le tiers & le cart dans les Parlemens par pensions & promesses. Le tout au detrimement de l'Estat, & pour assouuir cet orgueil d'estre le seul dominant, & esleuer sa maison Prouençalle au dessus de la Royale, au preiudice du Roy, de Mōieur son frere, de la Royne sa mere, & des Grands de la Couronne. C'est

pourquoy les Diaphoristes du temps, qui péné-
trent dans les secrettes menées des Caballes, &
tous nos Prophetes Gaulois soustiennent vnani-
mement que Luynes butte, ou à vne vsurpation,
ou à vne dissipation de la Monarchie, tirans tous
leurs argumens de la suite de ses progresz.

Or parmy les durs ressentimens qu'apporte la
preuoyance d'un mal public; ie ne laisse neant-
moins de prendre par fois un grand contente-
ment à les entendre discourir la-dessus. Et ainsi
sans m'arrester au iugement qu'ils en font, ie des-
duiray seulement les raisons qu'ils en alleguent.

En premier, ils s'arrestent aux augures fune-
stes qui ont depuis trois ans en ça enuironné le
Louure, entre lesquels ils en remarquent deux
signalez sçauoir l'embrasement du Palais, de la
Iustice, bras droict de la Royauté, qui de fond en
comble a esté deuoré par le feu, avec toutes les
effigies des Roys de France, & celuy des Tuil-
leries, lieu de plaissance des Roys, orné des plus
rares peintures de la Chrestienté, où Henry I V.
n'auoit voulu permettre que l'on y esleuast le
Roy d'apresent durant sa ieunesse, de crainte que
les femmes & enfans ne gastaient cette demeu-
re qu'il auoit reseruée pour vne retraicte à sa
vieillesse: Et cependant l'insolence de Luynes s'est
portée iusques-là, que de remplir les riches sal-
les de ce logis, de paille, & foin pour la prouision
de ses cheuaux: qui a esté cause que l'accident
d'une chandelle à reduit en cendre les plus sum-
ptueux lambris, plafonds & superbes cheminées
de l'Europe. En suite de ce sinistre presage, ils
presupposent un siecle tout corrompu en l'Egli-
se, en la Iustice, Noblesse, & Bourgeoisie: Tous

les Princes (notez cecy) ieunes, foibles, diuisez entre-eux, sans grandé experience, abbatus d'un Fauory, qui sans contredit taille, coupe, rongne, & dispose de l'autorité Royale, de laquelle il s'est emparé par leur lascheté. De-là il le concluét par cette maxime infallible: que tout valet qui fait mieux ses affaires que celles de son Maistre, & qui se reuest effrontément de son autorité, tost ou tard il à enuie de le despoüiller.

Cadnet (Duc de Chaume) ne faict pas la petite bouche, qu'il veut pour sa part la Prouince de Picardie, Branthe la Normandie, & Luyne la Bretagne, le bruit estant tout eomun qu'il aspire l'engagement de ce Duché, pour asseurance de cinq millions de liures qu'il dit auoir presté au Roy: Il butte aussi à s'approprier du pays d'Albert à cause de la conuenance avec le nom d'Albret, à fin que la transposition d'une R. ils se puissent dire Princes du sang, & en suite legitimes heritiers de la Couronne: Ceux qui s'en pensent rire, qu'ils se souuiennent qu'un an deuant que de se faire Cōestable, il en fit courre le bruit, pour escouter ce que le monde diroit, il fait de mesme pour l'alienation de la Bretagne, & de ce qu'il fait publier que sa Majesté le veut faire Roy d'Austrasie, & luy donner la Couronne de Nauarre, par où il fait cognoistre ouuertement le desir qu'il a de paruenir à la Royauté: Adjoustés à cela, disent les clair-voyans, le mespris qu'il fait des Princes du sang abbatarissant peu à peu le respect deu à ceux de cette qualité, les jettant tant qu'il peut dans l'opprobre pour les faire decrier parmy le peuple: Il n'espargne pas mesme le Roy, sur lequel il rejette la mal-
veillance

uant luy, & que de son costé il n'estoit obligé de faire mieux qu'eux que c'est l'opinion de Mademoiselle de Gournay, & Rousselay, que ie deuois nommer le premier, voire mesme du Pere Arnoux, & de toute la saincte Societé.

Ainsi nos Conseillers aussi bien que nos Princes, semblent consentir à tout par vne commune lascheté. Que n'ont-ils pour le moins autant de preuoyance pour la conseruation de l'Estat, que Luyne en a pour la sienne propre? Il y a tantost quatre ans que i'oüys les trois freres consultant de leurs affaires en vne des châbres du Louure, enquoy ils tomberent tous d'accord qu'il falloit en toute diligence qu'ils se fortifiassent le plus qu'ils pourroient d'alliances, d'argent, & de places; Afin, disoit Branthe, que tous ceux que nous auons offencez, & que nous offencerons, ne nous pussent nuire, en cas que le Roy vienne à nous manquer, soit par le deceds de sa Majesté, soit par vn changement d'affection: Nous auons ces deux poincts à craindre, disoit Cadnet: mais vous oubliez la Roynne mere. A quoy il nous est aysé de remedier, en la detenant tousiours prisonniere, ou en luy donnant tant de trauerses, que nous en puissions estre deliurez par les ennuy's. Le plus seur de tout, repliqua Luyne, est de nous establir par tout si puissamment, que nous puissions donner la loy à qui nous voudra heurter, quelque accident qu'il suruienne: Nos Princes & Conseillers deueroient faire le mesme, & preuoir que des petits galans ne se rendent si absolus dans cette Monarchie, qu'ils ne se facent souuerains, en cas qu'il arriuaist faute du Roy, ou que sa Majesté vint à recognoistre les abus de tels Fauoris, & à

vouloir chastier leur insolences ? Qui ne voit que Luyne seul est si puissant de villes, de Finances, & de Creatures, qu'il peut plus aysement tra-
 uerser le Roy en son Royaume, que le Roy luy ? C'est la preuoyance generale que doiuent auoir tous les François: Car si le Duc d'Espernon à bien donné la loy à ces Messieurs, n'ayant que trois ou quatre places, à plus forte raison, Luyne qui a des Prouinces entieres avec les meilleures fortresses de l'Estat. Et puis il est si accoustumé à faire le Roy, que mal-aysement luy en fera-on quitter la pratique. Il commande en Roy, parle en Roy, escrit en Roy, ose mander que ses paroles valent Breuets: Il ne pense pas que sa Majesté puisse faire dauantage; Il a plein vne escarcelle de Breuets, de pensions & d'Estats de Mareschaux de France, avec lesquels il beffe vn chacun: Ce n'est pas iusques à Chastillon qui a trahi sa Religion pour estre de ces Mareschaux à la douzaine, desquels on fera aux premiers iours vne compagnie de Carabins: Ha ! Chastillon ! tu n'es pas descendu de ce Gaspard, tu es de la race du siecle, & comme tel tu as esté chassé honteusement hors de Montpellier avec toute ta famille, qui sera à iamais vne marque d'ignominie pour ta posterité.

Helas ! il n'est pas seul enfariné d'ignominie, tous nos Grands en sont vn peu barbouilleez, excepté le Duc du Mayne. Aussi bon Dieu à quel degré de mespris est aujourd'huy reduite la reputation de nos Princes ? Il y a del'horreur à l'escouter & de l'estonnement à le croire, chacun les despeignant avec les plus chetiues couleurs du monde. Les personnes iudicieuses en general les tiennent sans cœur, sans honneur, & sans pre-

uoyance. C'en'est pas iusques aux femmes qui ne les mesprisent ? Il y à quelque temps que i'escoutois des Crocheteurs beuuans en vn cabaret, l'vn desquels se mit sur la fripperie des Grands & sans respect de leurs extractions, qualitez, ny crainte de reprehension de Iustice, disoit mille sornettes d'eux: Mais ce que ie supporte plus impatientement, ce sont les mesdisances qui se publient au de sauantage de l'honneur deu à ces bōs Princes de la Maison de Guise, vrais Catholiques s'il y en eut iamais, & qui ont tousiours eu (quoy qu'on en die) plus d'ambition de bien faire que de regner, principalement ceux d'apresent, lesquels neantmoins on accuse d'estre tant soit peu lasches, quoy qu'au reste tres-gens de bien & fort endurans: horsmis le Cardinal qui sollicite ses procez à coup de poing. Cependant quelques enuieux heretiques ou fauteurs appellent Monsieur de Guise tantost Pere souffrant, tantost estaffier de la faueur, Dieu te gard la Rose & autres semblables tiltres ridicules, qu'ils disent auoir acquis selon les occurences du temps, ce qui raualle grandemēt la gloire que ses ancestres auoient acquis à cette race. Mais ce que i'entendis de trois personages deuisans dans le Cabinet du Garde des Seaux; me fit seigner depuis le front iusques au nombril. Ils soustenoient qu'un des bons Mareschaux de France auoit porté parole au Duc de Guyse, que les Ducs du Mayne & de Neuers l'attendoient avec son frere Ginuille, & que si le cœur luy en disoit qu'il les conduiroit tous deux au lieu où les autres estoient; à quoy le Duc seigna du nés. En suite vn autre assura que Monsieur de Neuers auoit en-

uoyé vn Gentil-homme Lorrain nommé Bolandre vers le Prince de Gynuille pour l'appeller en duel. Bolandre estant à Fontaine-bleau, va droit au logis dudit Prince qui le cognoissoit, lequel d'abord l'embrassa, & luy fit mille caresse, ne sçachant le sujet qui l'amenoit en France. Ce Lorrain demeure huit iours à sa suite sans descourir son dessein à personne, espant tousiours l'occasion de luy porter la parole du combat. Vn iour Gynuille, & quelques autres discourans des belles Dames, le Prince dit à Bolandre qu'il luy en vouloit faire voir vne des plus belles de Paris: Ce Lorrain luy repliche qu'il en sçauoit vne plus gentille que la siene, que s'il luy vouloit iurer d'estre secret qu'il la luy feroit voir en chemise: Gynuille luy promet, mais dit le Lorrain, vous auez des gardes: le moyen de vous eschapper, laissez moy faire, dit le Prince, ie m'en desmesleray bien: Alors Bolandre s'approchant de son oreille, luy dit, c'est Monsieur de Neuers que ie vous feray voir en chemise avec l'espee en la main, & vous y couduiray si le desirez: A ces mots, ce Prince, au lieu d'aller où son honneur l'appelloit, s'excusa tout haut, disant qu'il ne s'y pouuoit trouuer contre les deffences du Roy, ny quitter les gardes que sa Majesté luy auoit fait bailler. Ainsi l'affaire fut esuentee, & Bolandre s'eschappa.

Le Duc de Guise a fait vne cagade aussi gentille que celle-là, qu'en despit de ce que Luyne luy refusa de traiter de la charge de General des Galleres, il partit de Fontaine-bleau pour s'en venir à Paris, en resolution de mettre de force son frere le Cardinal hors du Bois de Vincennes. A cet effect il communiqua son dessein au Che-

ualier de Bioux, lequel il coniuira de se tenir prest avec ses amis, pour le lendemain matin; Bioux qui est braue & hardy tout ensemble, luy promet, & de faict, dès l'heure donnée, il ne manqua de se rendre à l'Hostel de Guyse, pour aduiser aux moyens de l'execution. Il trouue le Prince encore endormy, & comme il se pourmenoit en la Cour du Manège, attendant qu'il fust esueillé, il rencontra l'Abbé de Han l'Escalopier, auquel il demanda où il alloit si matin? Faire visites, dist l'Abbé; si vous n'estes pressé, repliqua Bioux, ie vous veux faire veoir vn homme qui estoit hier au soir extremement camus, & ce matin i'espere que vous & moy le verrons sans nez. L'Abbé de Han qui est bon railleur, dict qu'il en estoit content, & ainsi s'en vont droit à la chambre du Duc, lequel s'habilloit, apres luy auoir faict la reuerence. Bioux luy demanda s'il s'estoit souuenu des propos qu'il luy auoit tenu le iour d'aparauant? Ouy bien, respondit le Duc, mais i'ay resué tout la nuict sur cét affaire, & ay trouué qu'il est plus à propos que i'enuoye ma femme à Fontaine-Bleau, pour faire scauoir à Monsieur le Connestable mon desplaisir, & ma resolution quand & quand, au cas qu'il ne me donne contentement. Hé bien (dit Bioux à l'Abbé:) Ne suis-ie pas homme de promesse, ne vous ay-ie pas dit que ie vous ferois veoir vn Gentil-homme qui estoit hier au soir bien camus, & que ie vous le ferois voir ce matin sans nez? A ceste repartie chacun se prit à rire, & le Duc comme les autres. Tant il est bon Prince? Apres cela il ne faut plus s'estonner si nos Fauoris font les Roys, puis que la lascheté de nos

Grands sert de marche-pied à leur formidable establissement. Car qui considerera depuis le commencement de leur fortune iusques à l'heure de maintenant il remarquera que la seule pusilanimité des Princes les a portez où ils sont à present, ce que Brante, Luynes, & Cadnet n'eussent iamais entrepris s'ils eussent veu en eux tant soit peu de generosité, estans les plus timides poltrons qui soient onc sortis de Prouence, tesmoin ce qui s'est passé aux mouuemens derniers, où aucun d'eux n'a fait aucun exploit, ny paru à la campagne; Luynes s'estant toujours tenu dās le quartier du Roy; Cadnet s'estant renfermé dans la Citadelle d'Amiens, & Brante estant demeuré hypochondriaque dans Poictiers, au lieu d'estre tous trois les premiers aux charges de guerre, comme ils veulent estre aux charges de l'Estat, puis que c'estoit pour eux, & contre eux que la feste se prepaioit.

Cadnet, n'a-il pas monstré en toutes ses actions qu'il n'est propre qu'à la piaffe & recentemente en son Ambassade d'Angleterre, où il est allé avec vn equipage Royal, ayant eu l'ambition de se faire suivre par huiet ou dix Cheualiers du Saint Esprit? Ce qui fut cause que les Anglois par complimens luy presenterent vn Cartel de deffi de dix contre dix au Tournoy, dont il s'excusa honteusement, sur ce qu'il disoit n'auoir amené ses grands cheuaux pour paroistre en la course, & sur ce que les autres luy offrirent de l'en accommoder des meilleurs de leurs Escuries. Il repliqua qu'il estoit pressé de s'en retourner, engageant par là lasche deffaicte l'honneur de son maistre, & de la nation Françoise. Si Bran-

they eust esté en sa place, il eust mieux mis sa reputation à couuert: Car il n'a pas de honte de marcher à la teste de la Compagnie des cheuaux Legers du Roy, sous vn Parasol de velours cramoi, ainsi que les Dames de Poictiers l'ont remarqué au voyage de l'année passée. Et puis faites vous assommer pour deffendre telles gens, qui ne demandent que la mort d'autrui pour attraper leur despoüille. C'est pourquoy Monsieur de Montmorency doit prendre garde de ne se trop engager en la guerre de Lâguedoc, que si par mal-heur il luy arriuoit d'estre tué, ils se moqueroient de luy, en se reuestissans de ses charges. Ainsi les bonnes femmes disent qu'ils sont habiles de rencontrer tous les iours des fots qu'ils attirent à leur party, renuersans par promesses tout ce qui s'oppose à leur grandeur, tesmoin la Ligue des mal contents, qu'ils ont descoufue sans mettre la main à l'espee.

Là dessus, i'en oy d'autres qui repliquent que ce n'est pas leur habileté: Mais la seule lascheté des hommes du temps, qui a rendu leur fortune heureuse & de duree? Or en tout cela qui m'a le plus embroüillé la ceruelle ont esté les diuers discours que i'ay entendus sur les occurences des mouuemens derniers, à raison des diuers iugemens que chacun en faict, selon la passion qui l'emporte. Les vns soustenans les armes de la Royne mere auoir esté tres-iustes, comme fondees sur la deffiance de sa liberté, & pour preuenir les oppressions dont elle estoit menassée par les violences d'un Fauory, qui par des artifices abominables de charmes & de mensonges s'efforce de destourner l'affection naturelle du Roy son

filz, afin de le posseder seul, en depossedant la mere de la place qui luy est deuë, & dans l'Estat, & dans le cœur de sa Majesté, abusant de l'autorité souveraine, pour opprimer tous les grands.

Ceux qui deffendoyent Luyne, disoyent au contraire, que c'estoit au Roy à qui on en vouloit, contre lequel on ne peut iamais armer iustement quelque pretexte que l'on puisse prendre. Qu'il n'appartient à la Royne sa mere de controller les affections de son filz; Qu'elle se doit contenter de l'honneur que sa Majesté luy rend, sans qu'elle ny les Princes se meslent de l'Estat, qui est gouverné si sagement, par la prudence de Monsieur de Luyne, que la femme de d'Eagen a soustenu deuât Madame Desdiguieres, qu'il auoit mis les affaires de la France dans les voutes Empirees. Tant ceste Dame a de naïueté! Toutes ces raisons neantmoins n'ont pas empesché la leuee des armes, du succès desquelles j'ay encore eu les oreilles diuersement battues, les vns extolliant les exploits de Luyne à l'égal des conquestes de Charlemagne, & les autres du party de la Royne mere: accusans le tiers & le quart du mauuais succès des affaires, pour palier leur lascheté & excuser leur imprudence.

Pour donner mieux tout cecy à entendre, il faut raconter ce que j'ay ouy des plaintes des particuliers pensans courir en gros les fautes qu'ils ont commises dans le detail. Les premiers sont ceux qui auoyent entrepris de deffendre la Normandie des oppressions de Luyne. En quoy ils se sont trouuez descheuz; non par faute de disposition du costé du peuple, mais pour n'auoir sçeu tenir l'ordre qu'un masse courage y eust peu

peu apporter, & par ceste voye eschauffer ceux qui se sont refroidis, voyans si peu de resolution aux Chefs qui les deuoient deffendre: Ceux qui estoient au Pont de Sé, chantent vn pareil jargon, chacun reiellant la faute sur son compagnon & nul confessant la siene. Hors mis le Duc de Rets, qui soustient n'auoir reculé que pour mieux sauter prouuant par le prouerbe Italien, que *non fugge chi torna à casa*: en quoy s'il a eu du du mal'heur, il l'attribuë aux bleuea-venes que son oncle le Cardinal luy à faict prendre, qui luy ont causé beaucoup de honte & peu de profit, en quoy il a receu vn notable interest en la necessité de ses affaires. Pour tous les autres, ils mettent leur Poltronnerie à couuert sous la Mitre de l'Euesque de Luçon, lequel ils chargent de toutes les disgraces qui leur sont suruenues, à railon des intelligences qu'il a tousiours eu avec Messieurs de la faueur; l'Euesque d'un autre costé, reiette tout le mal aller sur les impertinences des esprits de quelques vns, & bassesse de courage des autres, qui ne sont propres qu'à faire les turbulens dans les villes, & non à s'opposer genereusement au peril des combats.

Or parmy la diuersité de ces raisons, ie me trouue quelquesfois si confus, que ie suis contraint d'auoir recours à mon escoutoir, pour entendre les aduis des iudicieux du temps, lesquels aprofondissans le tout meurement, soustiennent que Luynes ne peut s'attribuer grande gloire en la victoire du Roy; Ny la Royne mere grand blâme en la conduite de son party: Pour le Roy, il à vaincu sans ordre, & elle a combatu sans resistance, ce qui a demonstré la foiblesse generale

de l'Estat François : Car il n'y à rien de plus certain, que si l'estranger fust entré dans le Royaume avec seulement dix mille hommes, il eust fait fuir deuant luy les forces du Roy, & celles de la Royne sa mere, tant il y auoit de confusion & de chefs peu experimentez de part & d'autre.

De sorte, disent-ils, que la seule presence du Roy, que Luyne a hazardé pour se mettre à couuert, a esté vn espantail à niais; & partant les trophées de Monsieur le Connestable ne sont si grands qu'on les publie, puis qu'aisément on les redige par escript, en des petits liurets de trois feuilles, dans lesquels il ne se peut remarquer aucune chose digne d'estre laissée à la posterité. Quand au fait de la Royne mere, il n'a pas esté renuersé faute de Iustice: mais par la seule lâcheté de la pluspart de son parti: Qui a empesché qu'on n'aye mieux fait dans Rothen, & que ceux qui commandoient n'ayent preueni ceux qui les ont preueni? Ce n'a pas esté la barbe de Monsieur nostre Archeuesque, ce n'a esté que leur foible resolution: Surquoy s'excusera Prudent de n'auoir mieux munitionné & deffendu le Chasteau de Caen? pourquoy quelque Grand ne s'est-il ietté dedans, ainsi que fit le Duc du Mayne dans Soissons? Si ceste place eust esté confiée à vn homme de courage, la moindre defence faisoit tourner les dos aux armes de Luyne, & donnoit temps à celles de la Royne, qui par ce moyen eust deliuré l'esprit du Roy du charme des trois freres: Ceux qui sont pres de Madame la Comtesse de Soissons, sur qui reietteront-ils la confusion de leurs broüillons conseils? Sera-ce sur l'auarice qu'ils publient de leur mai-

stresse ? Cependant qui les escouterà caqueter, ils ont fait des merueilles. Autant en diront plusieurs autres qui sçauent faire mille belles propositions, & n'en sçauent executer aucune. Non plus que Marillac les desseins de ses fortifications, ny le Cardinal de Sourdy arrester le vol de ses legeres imaginations: En vn mot voilà le veritable pourtraict de ces derniers mouuemens, où Luyne a employé l'entiere autorité & les Finances del'Estat pour son seul interest; Là où il est à presumer que la Royne mere a esté contrainte de s'incommoder en la conduite de ses affaires, pour s'accommoder à l'interest d'aucuns particuliers qui la suiuoyent; Luyne au rebours risquoit son maistre & son Royaume aux despens du public, pour seul se mettre à l'abry de l'orage.

Ce que la Royne mere n'eust iamais voulu hazarder, comme de faict elle a bien monstré, ayant mieux aymé s'affuiettir à vn traitté de paix, quoy que des-avantageux, que de regner en la confusion: Ainsi qu'elle eust peu faire, si elle eust passé en Guyenne. Mais son bon naturel l'a tousiours retenuë dans le respect & amour quelle doit au bien des affaires du Roy son fils, & du public. Pleust à Dieu que Luyne en eust autant pour son Maistre, les choses ne seroyent reduites en l'estat desplorables qu'elles sont à present, par la glouttonnie de son ambition deuorante, qui le faict passer par dessus tout respect, pour paruenir au but de ses orgueilleuses pretentions. C'en est pas iusques à la personne du Roy, de laquelle luy & ses freres abusent avec mespris. Se peut-il rien remarquer de plus insolent, que ce

qu'à faict Brantche, quand de haute lutte il osta à la Chaisnaye la place de premier Cheuan-Leger de la Compagnie du Roy, pour la bailler à la Faucherie, au preiudice du don que sa Maiesté en auoit faict de sa propre bouche à la Chaisnaye? Mais vn de mes plus grands plaisirs, fut lors que i'escoutay la reprimande, que Luyne fit à Desplan, sur le sujet de la charge de Grand Preuost. Il faut icy noter que lors que les premieres nouuelles de la maladie du Sieur de Berengeuille arriuerent au Louure, Desplan ioiioit avec le Roy, qui de son propre mouuement luy donna ladite charge, au cas qu'elle vint à vacquer. Ce don estant venu aux oreilles de Luyne, il enuoye aussi tost querir Desplan, & avec vne esmotion de cholere, luy demanda qui l'auoit faict si hardy que d'accepter ledit Estat, avec de grandes menasses. De sorte qu'il fallut que Desplan luy remist ledit Office de grand Preuost: Au mesme instant ie vis Luyne qui alla trouuer le Roy, auquel il dist d'abord, sans parler ny de parchemin ny de cire. Auez vous donné la charge de Berengeuille à Desplan? Sa Majesté à demy surprise, respondit que ouy, Vrayement, repliqua Luyne, vous sçaez bien ce que vous faictes! Cette charge est la recompense d'un braue Cavalier, & vous l'allez donner à la vollee à vn ieune sot. Voila bien le moyen de ruiner vos affaires.

Quand ie considere ce que dessus, ie demanderois volontiers à Luyne, qui taxe le Roy d'auoir grrtisifié Desplan de la Grand Preuostté de l'Hôtel, auquel de fait il l'a osté, pour en reuestir Modene son oncle. Que dira-il, si on l'interroge sur l'Estat de Connestable, qu'il à extorqué de sa

Maieſté? Reſpondra-il que le Roy ne fait point de faute quand on luy donne quelque chote? Il n'oſeroit dire non plus que ſa Maieſté l'aye fait par deliberation de ſon Conſeil: Le contraire ſe prouue par les lettres que le Roy a eſcrit aux Grands de ſon Royaume ſur ce ſuject, lesquelles Luyne a fait dreſſer à ſa fantaſie. En voicy la teneur de quelques-vnes. *Je vous ay auſſi voulu donner aduis comme i'ay pourueu mon Couſin le Duc de Luyne de la charge de Conneſtable de France, ayant iugé que le reſtabliſſement d'icelle ſeroit grandement vtile & aduantageux au bien de mes affaires, & de mon Royaume, en la mettant entre les mains d'un perſonage qui ait toutes les bonnes qualitez qui ſont en luy, en quoy ie m'aſſeure que le ſuccex reſpondra à mon attente, & que les effets reuſſiront au contentement de ceux qui aymeront ma perſonne, & le bien de mon ſervice, &c.* Ces lettres dattees du quatrieſme Auril, à Paris. Par icelles on voit qu'il n'y à vn ſeul mot qui face mētion que l'affaire ait paſſé par l'aduis du Conſeil, elles portent purement la volonté du Roy, & les loüanges de Luyne, qui ſans capacité & ſans neceſſité à voulu faire reuiure en luy ceſte dignité, qui auoit eſté ſupprimee par l'aduis du ſeu Roy & de ſon Conſeil, & tout cela en brauade des Grands, & au preiudice du Royaume. Entre les Centuries de mon predeceſſeur, voyci ce que i'ay trouué ſur ce ſuject.

Lors que l'on verra renaître

Vn Conneſtable nouveau,

Vn valez fera renaître,

Et la France ſon tombeau.

Mais d'autant que le ſens du dernier vers eſt yn peu ambigu, ne ſçachant s'il entend que ceſte

charge fera le cercueil du Conneſtable ou de la France, ie prierois volontiers l'Archeueſque de Sens de l'eſclaircir: Ou bien ie me mettray de bon cœur à genoux, pour ſupplier Luyne de declarer franchement, lequel il choiſiroit des deux. Ie croy qu'il affectionne tant la France, qu'il aymeroit mieux qu'elle periſt que luy, parce qu'il à le ſecret de la pouuoir faire reſſuſciter par l'entremiſe des Ieſuites, avec aſſiſtance de l'Eſpagne, à laquelle ſous main il ouure les bras, teſmoing les affaires du Palatinat, de la Valteline, & les remuemens nouueaux contre les pauvres Huguenots que l'on attaque, afin que ſous couleur de Religion, Luyne ſe puiſſe approprier de la Rochelle, pour y baſtir le bouleuart de ſa grandeur, & par ce moyen mettre le feu dans l'Eſtat, qui eſt le deſſein de Caſtille, qui pretend par là auoir part au debri: C'eſt ce que mon bon Hermite à remarqué en ceſte Centurie, de laquelle les vers ſont tels.

*La ſaincte Ligue culbutée,
Sous le regne du Grand Henry
Se trouuera reſſuſcitée,
Sous le regne d'un Fauory.*

Helas! qu'il y a grande apparence de redouter les effects de ceſte Prophetie. Si la Martilliere à oſé dire en ſa Harangue, que les predeceſſeurs de Luyne auoient reſtabli nos Rois en leurs troſnes lors qu'il enuoya comme valets les Ducs de Guyle, & Deſdiguieres pour faire enregiſtrer au Parlement ſes lettres de Conneſtable, n'ayant daigné faire l'honneur à ce corps de les y preſenter luy meſme! Pour moy, i'oſerois bien aſſeurer, ſuiuant la voix publique que nous & nos

successeurs diront qu'un Fauory les a détrosnez
 dans l'opportunité d'un siecle corrompu, où tout
 est vente, la vertu sans prix, la probité desesti-
 mée, & l'infidelité recompensée. Helas! sera-il
 reproché à la France qu'un homme de neant dis-
 sipe l'Etat, & face plier sous son autorité tous
 les Grands de la Monarchie, sans que personne
 s'oppose aux desseins de la Souueraineté qu'il
 usurpe insensiblement! Abusera-il tousiours du
 nom du Roy, & de la tutelle de Monsieur son
 frere! Monsieur le Prince de Condé laissera-il
 passer l'heritage de ses peres à vne lignee estran-
 gere? L'honneur ne l'animera-il pas pour des-
 fendre l'innocence de ceux de son sang? L'Euef-
 que de Luçon trempera-il tousiours dans les
 conseils foibles qu'il donne à la Roynemere, afin
 qu'elle serue de trophée à la grandeur de Luyne,
 qui la faict suiure par tout, comme vne simple
 seruante? Monsieur le Comte croupira-il sans
 fin dans l'oisiueté sous vn Gouverneur Pedant?
 Le grand courage de Madame sa mere ne le por-
 tera-il point à se ressentir du mespris que l'on
 faict de luy? Ville-loing destournera-il tousiours
 la generosité de ce braue Duc du Mayne, seule
 esperance des François? duquel Luyne s'est mo-
 qué, comme il a faict aussi des Duc & Cardinal
 de Guise, Guinille, d'Elbeuf, Montmorency,
 des Ducs de Nemours, Longueuille, Nevers, de
 Vendosme, du Grand Prieur, de Rohan, la Tri-
 mouille, Subise, Crequi, & de tous les Maref-
 chaux de France, qui sont aujourd'huy réduits
 sous le commandement d'un Conestable Fau-
 connier? Ha! qu'ils auroient bien plus d'hon-
 neur de mourir glorieusement, en s'opposant à

tels Fauoris, que de languir honteusement comme ils sont sous la domination de leur insolence! Et toy pauvre Desplan, medite souuent sur la mort du pauvre Haran, qui eust esté Connestable s'il eust veü. C'est pourquoy Luyne voyant qu'il entroit trop en faueur, l'enuoya en commission dans l'autre monde, qui est vne belle leçon pour toy, contre des gens qui veulent estre absolus. Et quant au Marquis de Quæure, il se souuiendra s'il luy plaist, qu'au mois de May de l'an six cens vingt & vn, Luyne luy a escroqué Laon, comme long-temps yà Caen au Grand Prieur, pour monstrier que Luyne veut tout auoir. Ainsi ie concluray que la condition du Roy (qui ne voit ny oit que par autrui) est déplorable, que les plaintes des deux Roynes sont considerables, que la pusilanimité des grands est extremement blasmable, que leurs excuses ne son receuables, que le mal qui a pris racine dans l'Estat est irremediable, mais que l'autorité que Luyne vsurpe est par dessus tout formidable, puis qu'on voit appertement qu'il n'a dessein que de mal faire, sur tout de se seruir finement du pretexte specieux de la Religion, pour estouffer les Catholiques Royaux, sous ombre de ruiner les Huguenots, & par ceste voye destituer Monsieur frere du Roy, & tous les Princes du Sang, du seul appuy qui leur reste pour s'oposer à la tyrânie de Luyne, & à l'vsurpation qu'il proiecte de l'Estat.

Reprenez cour abbatus Princes:

Ouurez les yeux pauvres François:

Et n'attendez plus que trois Roys,

Partagent du R O Y les Prouinces.

F I N.



